

H



Wetstai - Sa'23



H

H.



Langi Ferle - Su'23



H.

H.



Huis zum Basilisgg - Ja'23



H.

H



Campanachisler · Su'23



H



E Mythos scho in dr Antigge beschwoore,
E Schlang us eme Hienerai geboore,
Vomene Giggel usbrieted voller Gschigg,
Mit giftigem Odem und deedligem Bligg...

Und grad wel vyyli dää Lindwurm schreggt,
Hän d Baasler iin fir sich endeggt,
Und hit draht dr Basilisgg voll Stolz
Dr Baaslerstägge in Staal und Holz.

Aaber nit alli gschlupfte Voogelviicher
Mache unser hittsdaags Baasel ryycher.
Doorum spitzet d Leffel, looset dää Bricht
Vonere bestialisch druurige Basilisgge-Gschicht:

Gschloffte us Bappe Schlöths Fantasie
Hänn vier Brieder iire Horscht gfasst oob em Ryy
Und hänn deert d Wettstaibrugge bewacht –
Syt 1880, Daag und Nacht.

Au Faabeldier lyude unter Menschehand,
Und dr Stroosseverkeer nimmt iiberhand.
Me butzt dr Horscht, es goot rugg-zugg,
Und zwoor fir e braiteri Wettstaibrugge.

Dr eerscht Voogel fliegt nit wyt dervoo
Und het sich imne Hinderhoof niidergloo.
No hit wacht äär z Baasel, wenn au e glai schyssidig,
An dr Schützematstrooss Dreiedryssidig.

Dr zwaiti Drach isch in die Langi Erle koo
Aaber dää Blatz het me im schnäll wiider gnoo,
Well Dangg dr Regierig stoot dä Dropf
Jetz wiider bi de Daigler als Bruggekopf.

Die dritti Schlang isch am wytischte koo,
Vo Ängelbärg bis Nyon hesch syy Graaie vernoo.
Sit Zwaiduusig-Acht, und nach langem Waarte
Stoot si aaber als Ersatz im Erlegaarte.

Dr viert Basilisgg, dä ka me gsee
Vom Schiff us am Vierwaltstättersee;
Bi Megge stoot äär guet verstegett,
Luegt wäär und was sich im Wasser bewegt.

Richtig, me ka saage, die vier Brieder sin no doo,
D Cultura Basilisgiensis het uns niemer gnoo,
Und drotzdäm gheert dr letscht uff Baasel hai,
Und mit dääre Initiative steen mir HUNNE nit elai.

Vyylli hänn iir Gligg vergääblig brobiert,
Au mir hänn verhandlet, fascht scho gschmiirt,
Sinn denn gschytteret uff diräggtter Schiine,
Denn e Stiftig sait dä Drache gheert iine.

Jänu, die Stiftig kunnt halt nit so druus,
Und unseri Sonderainhait ruggt jetz us,
Soo wiird dr Status „VERMISST“ revidiert,
Und z Baasel steen d Basilisgge wiider z viert.

Sujet: Gwartett komplett
Requisit: Dr Trumpf
Vordraab: D Wächter
Major: Fritschi Brueder (dr Spitzel)
Spiel: Pleonasmus (SE-18)